



**siaran  
akhbar**

diterbitkan oleh jabatan penerangan malaysia

**PEN. 1/81/12 (PM)**

USUL MERAKAMKAN UCAPAN TERIMA KASIH  
KEPADA BEKAS YANG DI PERTUA DAN  
BEKAS TIMBALAN YANG DI PERTUA DEWAN  
NEGARA OLEH YAB PERDANA MENTERI DI  
DEWAN NEGARA PADA 5.1.81

Tuan Yang Di Pertua,

Saya mohon mencadangkan:

"Bahawa Dewan ini merakamkan ucapan terima kasih atas perkhidmatan bekas Yang Di Pertua Dewan Negara, Yang Amat Berbahagia, Tun Dato' Haji Omar Yoke Lin Ong, dan juga bekas Timbalan Yang Di Pertua Dewan Negara, Yang Berbahagia, Tan Sri Datuk S.O.K. Ubaidulla."

Tuan Yang Di Pertua,

2. Yang Amat Berbahagia Tun Dato' Haji Omar Yoke Lin Ong telah dipilih menjadi Yang Di Pertua Dewan Negara pada 23hb Februari, 1973 dan ia telah tamat perkhidmatannya pada 31hb Disember, 1980, setelah memegang jawatan itu selama 7tahun 10 bulan. Tun Omar mula dilantik sebagai Senator pada 25hb April, 1964c.

3. Dalam tempuh perkhidmatannya sebagai Yang Di Pertua Dewan ini, Tun Omar telah menjalankan tugas dan tanggungjawabnya dengan penuh adil dan saksama. Dengan pimpinannya yang bijaksana, budibahasanya yang halus dan dengan sikapnya yang penuh sabar, ia dapat mengendalikan urusan persidangan Dewan Negara dengan licin dan memuaskan.

Tuan Yang Di Pertua,

4. Tun Omar adalah seorang yang mempunyai pengalaman yang luas dalam politik, perkhidmatan awam dan sosial. Dalam tahun 1952 ia telah dipilih sebagai Ahli Majlis Perbandaran Kuala Lumpur. Pada tahun 1955 ia telah dilantik sebagai Menteri Pos dan Talikom dalam Majlis Kerja Persekutuan (Federal Executive Council). Selepas itu ia pernah dilantik pula sebagai Menteri Pengangkutan, Menteri Buroh dan Kebajikan Am dan Menteri Kesihatan. Tun Omar adalah salah seorang daripada ahli Perwakilan Perikatan ke London dalam tahun 1957 untuk perundingan muktamad mengenai Perlembagaan bagi Persekutuan Tanah Melayu yang merdeka. Dalam tahun 1959 ia telah dipilih sebagai wakil rakyat bagi Ulu Selangor dalam Pilihanraya Parlimen.

50 Dalam tahun 1962 Tun Omar mula berkhidmat dalam lapangan baru, iaitu<sub>3</sub> sebagai Duta ke Amerika Syarikat dan Wakil Tetap ke Bangsa-Bangsa Bersatu, disamping memegang jawatan Menteri Tak Berpotfclio dalam Jumaah Menteri Kerajaan Persekutuan. Ia memegang jawatan itu selama 10 tahun. Tun Omar telah juga berkecimpung dengan giatnya dalam kegiatan-kegiatan sosial. Ia pernah dilantik sebagai Pengerusi Persatuan Palang Merah Tanah Melayu, Pengerusi Pasukan St. John Ambulance Tanah Melayu dan

Pengerusi Jawatankuasa yang memulakan Tabung Darah Kuala Lumpur dalam tahun 1949, Sekarang ia masih mengambil bahagian yang aktif dalam beberapa badan-badan sukarela, amal dan kebajikan,

Tuan Yang Di Pertua,

6. Apa yang saya telah sebutkan tadi adalah sebahagian kecil sahaja daripada sumbangan yang telah diberi oleh Tun Omar. Diatas jasanya yang banyak kepada rakyat dan negara ini, Duli Yang Maha Mulia Seri Paduka Baginda Yang Di Pertua Agong telah rnenganugerahkannya Darjah Yang Mulia Pangkuan Negara - Panglima Mangku Negara (PMN) dalam tahun 1959 dan Darjah Yang Mulia Seri Mahkota Malaysia - Seri Setia Mahkota (SSM) dalam tahun 1979.

7. Pada hemat saya, dengan pimpinanya yang bijak, budibahasanya yang halus dan sikapnya yang penuh sabar Tun Omar telah memberi perkhidmatan yang cemerlang kepada Dewan Negara khasnya dan Parlimen amnya. Sebagai tanda penghargaan, saya dengan sukacitanya mencadangkan supaya Dewan ini merakamkan ucapan terima kasih yang setinggi-tingginya kepada Tun Omar serta juga ucapan selamat bersara, dan berdoa mudah-mudahan ia sentiasa berada dalam keadaan sihat dan sejahtera.

Tuan Yang Di Pertua,

8.' Disamping bekas Yang Di Pertua Dewan ini, Timbalannya, Yang Berbahagia, Tan Sri S.O.K. Ubaidulla juga telah tamat perkhidmatannya. Tan Sri Ubaidulla telah dilantik sebagai seorang Senator semenjak tahun

1959 lagi, iaitu selama 21 tahun. Pada 22hb Mac, 1971 ia telah dipilih sebagai, Timbalan Yang Di Pertua Dewan Negara, Tan Sri Ubaidulla memang mempunyai pengalaman yang lama sebagai seorang Senator. Ini membolehkannya menjalankan tugas dan tanggungjawabnya dengan baik sebagai Timbalan Yang Di Pertua untuk membantu Yang Di Pertua. Tan Sri Ubaidulla juga mempunyai budibahasa yang halus dan sikap yang sabar dan ini membolehkannya menguruskan persidangan Dewan Negara dengan licin dan memuaskan.

9, Tan Sri Ubaidulla ialah seorang yang tidak asing lagi dikalangan masyarakat India di negara ini dan dibidang politik, sosial dan perniagaan. Saya tidaklah dapat menyebutkan satu persatu mengenai kegiatannya. Ia pernah mengambil bahagian dalam Majlis Perundangan Persekutuan dari tahun 1948 hingga tahun 1959, Majlis Perundingan Negara, Majlis Perpaduan Negara, Majlis Kebangsaan bagi Hal Ehwal Ugama Islam, Majlis Kolej Islam dan badan-badan sukarela seperti Majlis Pusat St. John Ambulance dan Majlis Pusat Red Cross Society.

10. Tan Sri Ubaidulla pernah juga dilantik sebagai President, National of Chambers of Commerce/Malaysia dan President, Malayan Council of Employer's Organization. Atas jasanya kepada negara, Duli Yang Maha Mulia. Seri Paduka Baginda Yang Di Pertuan Agong telah menganugerahkannya Darjah Yang Mulia Setia Mahkota Malaysia - Panglima Setia Mahkota (PSM) dalam tahun 1973.

11. Memandangkan kepada sumbangan perkhidmatannya kepada Dewan Negara khasnya dan Parlimen amnya, seperti, saya sebutkan tadi, saya dengan

sukacitanya mencadangkan supaya Dewan ini merakamkan ucapan setinggi-tinggi terima kasih kepada Tan Sri Ubaidulla, dan berdoa mudah-mudahan ia sentiasa berada dalam keadaan sihat dan sejahtera.

12. Tuan Yang Di Pertua, saya mohon mencadangkan.

KUALA LUMPUR,  
5hb Januari, 1981 (dikeluarkan pada pukul 5.00 petang)



No Siri	511
No Penerimaan	115/81